

संस्मरण सुरजो नायक

डॉ. नेमनारायण जोशी

लेखक—परिचै

डॉ. नेमनारायण जोशी रौ जनम 31 जनवरी सन् 1926 में नागौर जिलै रै गांव डोडियाणा में होयौ। आप जोधपुर रै जसवन्त कॉलेज सूं हिन्दी में प्रथम श्रेणी सूं सन् 1949 में अम.अ. पास करनै कल्याण कॉलेज, सीकर में हिन्दी रा प्राध्यापक नियुक्त होया। सीकर कॉलेज में 14 बरस ताई नौकरी करनै उदयपुर विश्वविद्यालय में हिन्दी विभाग रा प्रोफेसर अर अध्यक्ष रैया अर उण ई विश्वविद्यालय रै राजस्थानी विभाग रै अध्यक्ष पद सूं सेवानिवृत्त होया। वै राजस्थान साहित्य अकादमी, उदयपुर अर राजस्थानी भाषा, साहित्य एवं संस्कृति अकादमी, बीकानेर रा सदस्य ई रैया। डॉ. जोशी हिन्दी में छायावादी सलीके री घणी ई कवितावां रची, पण वां कवितावां नै छपाई कोनी। हिन्दी में फकत दोय पोथी छपी—‘सुमित्रानन्दन का नवचेतना काव्य’ (सोध—ग्रंथ) अर ‘चिन्तन—अनुचिन्तन’ चिन्तन प्रधान निबन्धां रौ संग्रै है। राजस्थानी री मोकळी पत्रिकावां में आपरी रचनावां छपी। ‘ओळूं री अखियातां’ वांरौ राजस्थानी संस्मरण—संग्रै है, जिण माथै वांनै साहित्य अकादमी, नई दिल्ली रौ राजस्थानी पुरस्कार मिळ्यौ।

पाठ—परिचै

संकलित संस्मरण ‘सुरजो नायक’ वांरै संस्मरण—संग्रै ‘ओळूं री अखियातां’ सूं लिरीज्यौ है। सुरजो नायक अक जीवंत पात्र है जिणरौ वरणन लेखक कर्यौ है। वौ अक ताकतवार मिनख हौ। ताकत उण मांय इतरी है कै वौ अकलौ ई पीठ माथै ऊखण’र पट्टियां मकान माथै चढाय देवै अर मिनख अचरज सूं देखता रैय जावै। दूजी घटना मांय दो नारेळां नै दोनूं हाथां सूं पकड़’र भच्च देणी भांग देवै। इण ताकत आळै सुरजै नै लेखक भूल नीं सक्यौ। आखिर मांय सुरजो कीं नसौ घणौ कर’र सुरग सिधारग्यौ।

सुरजो नायक

सुराज कांई आयौ, बळीतै तकात रौ गांव में टोटौ आयग्यौ। वौ भी जमानौ हौ, जद ‘पो—म्हा’ रै इसै ठारै में सिंझ्या री टैम, मिंदर में आरती री झालर बाजण रै सागै जागां—जागां सिगड़ियां चेत जाती। चीकणी गार सूं बणियोड़ी लूँठी सिगड़ियां में जाडी—जाडी कठफाड़ा पो’र रात गयां तांणी बळीतै रैवती, जठै जुड़’र भाई—सैण दुख—सुख री बातां करता। आज

आखै गांव में मात्र दोय मातबिरां रै अठै सिगड़ी चेतै—कै तौ सेठ हीरालाल जी महेसरी री दुकान माथै अर कै जीवण चौधरी रै बारणै। कांकड़ में रुंखड़ा ई कोनी रैया, आवै कठै सूं बळीतौ? मुरदौ बाळबा खातर पण लकड़ी रौ तासौ रैवै। अर बिरखा पिण गैल रा बरसां में फोरी घणी रैयी। इंदर बाबै रै पिण, के बेरो के आंट फंस म्हेली है, जिकौ तूठै ई

कोनी! रूसियौ थकौ रैवै। गांव री माळ में कदे चाळीस बेरा चालता, ज्यां माथै खायां काढता सींचारां रा बोल माऊमाव टकरीजता, बठै आज चालै मात्र पांच। बाकी सै सूख'र खोड़ा हुयग्या। मझ ऊनाळै जोहड़ में दोबड़ी ऊभी रैवती गोडा-गोडांणी, जठै नैड़ा-नैड़ा गांवां रौ धन ढूकतौ, बठै आज इणी'ज गांव री मड़कल गायां जमीं सूंधती फिरै, चरबा नै तिणकलै रौ ई काम नीं। अर कितरौ धान निपजतौ हौ इणरै खेतां-जावां में। छोटा-मोटा करसां रै अठै थळ्या-मूंडै पड़ियौ रैवतौ। आज धान सूं गार री कोठी पिण नीं भरीजै। घरां में जाय'र देखौ तौ नाज हांड्यां में लाधै। कांई जमानौ आयग्यौ देखतां-देखतां ई! कांई बीजळी पड़ी है कै राम ई निकळग्यौ इण गांव रौ तौ। करसण री बढोतरी सारु सिरकार बापड़ी घणी'ज कोसीस राखै, घणा ई तरळा लेवै, पण धरती ई उत्तर दे देवै जरै कांई हुवै!

इण भांत नान्हो-मोटो काततो परमो ढोली कांमळी रौ खो'ल्यौ ओढ्यां चौधरियां रौ गिराळौ पार करै हौ। माथै में वीं रै कूकड़ी बणै लागी ही। जितरै तौ डावै पसवाड़ै सूं हेलौ आयौ-“आव, आव दमामी, इयां कांई चाल्यौ परबारौ ई? आव, हाथ सेकलै थोड़ा। ठारौ बेजां पड़ै है।”

परमै री कूकड़ी रौ तार टूट'र मांय रौ मांय ताकळै माथै डोढौ-बांकौ लपटीजगौ। रूई री पूणी पिण के बेरौ कठीनै बिलायगी! जीवण चौधरी री आवाज पिछाणी जरै रस्तौ छेड'र सांकड़ै आवतौ बोल्यौ-“पड़ै कांई है चौधर्यां, नांव बूझै है। म्हारी ऊमर में तौ असी कोझी सरदी म्हूं को देखी नीं।”

“देखतौ कठै सूं? बूढीजण तौ हमै लागिग्यौ है। आवती साल थनै ओजू बेसी लागसी।” हमकाळै आवाज मोवन नाई री ही।

परमो थोड़ौ-सो मुळक्यौ। नैड़ौ आय'र देख्यौ-सिगड़ी घप्पळ-घप्पळ बळ रैयी ही। खेजड़ै रा तीन घोचा कीं बेसी लांबा होण सूं

नीचै जमीं माथै तीन पसवाड़ै टिक रह्या हा अर वांरा ऊपरला बूंगा राता लाल हुयोड़ा माथै सूं माथौ जोड़'र लपट री धजा उडाता म्हा' महीनै री ठंड सूं जूझ रह्या हा।

सांम्हीसाम बैठौ हौ जीवण जीवण चौधरी-घमकदार पेच रौ धोळौ पोतियौ बांध्यां अर खांधै दोवड़ी कामळ ओढ्यां। ओस्था पचास नैड़ी आयोड़ी, तौ पिण चैरै रौ रौब-दाब देखण जोग। कानां री लोळ तांणी आयोड़ी कलमां अर भरियोड़ी डंकदार मूछां। मूंडै माथै तेल पयोड़ी डांगड़ी जिसी पळपळाट, जिण में कदे-कदे सांम्ही पड़ी सिगड़ी रा घपळका पळकै। जीमणै पसवाड़ै मूगियां रंग रौ गोळ-घसक रौ फेंटौ बांधियां अर डील माथै धोळौ खेसलौ न्हांकियां बैठ्यौ हौ मोवन नाई। जीम माथै सुरसती बैठती। बात इसी ठावी करतौ जाणै टकसाळ में ढळ'र नीसरी हुवै। सांमला नै पड़ुतर नीं लाधतौ। आखर जोधराम रौ गुण कोई न कोई बेटा में तौ आवणौ ई हौ। पण जोधराज दारु सूं जतरौ आंतरौ राखियौ, मोवन बतरौ ई वीं रै सांकड़ै रह्यौ। दारु घणी पीण सूं वीं रौ चैरौ साव पतळौ पड़ग्यौ हौ अर होठ काळूंसीजग्या हा। इण बखत पिण वीं रै मूंडै सूं हळकी कसबू आय री ही। सिगड़ी रै डावै पसवाड़ै रातै पोतियै माथै धोळी घूघी ओढ्यां बैठौ है सांवतौ गूजर-चाळीस रै लंगै-ढंगै, पण गोरी चामड़ी माथै ओस्था री सळां हाल उघड़ी नीं ही।

उकड़ूं बैठ'र परमो आपरा हाथ खो'ल्यै सूं बारै काढिया अर सिगड़ी रा घपळकां में वांनै यूं उल्ट-पुल्ट करण लागौ, जाणै हाथ नीं, बाजरै रा सिट्टा सेक रह्यौ हुवै। थोड़ौ निवास आयौ जरै ढूडी टेक'र आराम सूं बैठग्यौ।

सांवतै रौ घर पक्कौ बण रह्यौ हौ। वीं कांनी मूंडौ फेर'र चौधरी बूझ्यौ-“थारै कमठै रौ कांई हाल है? पड़ियां चढगी हुसी आज तौ?”

अक घोचै सूं सिगड़ी रा खीरा आघा-पाछा

करतौ सांवतौ पड़ुतर दियौ— “कठै चढगी चौधरी? आजकाल रा मजूर न्याल करै है कांई? पो’र खंड दिन चढियां पै’ली तौ आवै ई कोनी। दो—दो वार वानै बुलाण खातर जाऊं अर जियां—तियां भाई—बीरौ कर, पोटा—पोटू’र ल्याऊं तौ आवतां ई घेरौ घाल’र चिलम पीवण नै बैठ जावै। काम माथै कांई आवै जाणै म्हारै माथै अँसान करै। रीस तौ म्हनै अणूँती ई आवै, पण करूँ कांई, मजबूरी रौ नांव महात्मा गांधी। आज पिण सूरज मथारै आयौ जठा तांणी तौ हाथ ई नीं घाल्यौ पट्टियां में, जाणै वां रै लारै सांप बैठ्यौ हुवै। फेर दो’रा—सो’रा होय’र नीठ आठ पट्टियां चढाई, जितरै तौ दिन तुरतुर्योक रैयग्यौ। बोल्या कै ज्हेगौ काम आज रौ तौ।”

मोवन नाई सूँ रैवणी कोनी आयौ। धोती रा चिल्ला साथळां रै पळेट’र गोडां माथै खींचतौ वौ ऊकडू होयग्यौ। बोल्यौ— “है कठै मजूर? पांच—चार ढंकळ हुयोडा नवादू छोरा? वां रा बाप ई करी कदे मजूरी? मजूरी करण आळै रै डील में ओसांण चाईजै, ओसांण। थारला अँ मजूरिया च्यार जणां मेळा होय’र सांकळां घाल’र ऊंच तौ लेवै पट्टी, पण वीं नै ले’र चालै जरै हेठानी पगां रा टांट्या लडै। इल्ल्यां है इल्ल्यां धान री, ज्यांनै पींचौ तौ पाणी नीसरै— रगत रौ तौ लवलेस ई कोनी।”

लकड़ी रा बूंगा बळता—बळता छेती खायग्या हा। वां रा खीरा झाड़’र माथा पाछा जोड़’र खवास ओजूं सरू होयग्यौ— “अर साची बूझै चौधरी तौ इस्या मौकां माथै सुरजो नायक याद आवै। होतौ आज बिलालो तौ अकलौ ई तीस पट्टियां अक चिलम पीवां जितरी देर में— सर्ड... सर्ड... जरै ई सरका देवतौ।

“अकलौ पट्टी चढा देवतौ?” सांवतै री आंख्यां इचरज सूँ चौड़ी होयगी। मोवन नाई रा गोडा आंच सूँ तपग्या हा। दोयूं हाथां सूँ

वानै पंपोळतौ वौ लारै सरक’र जबाब देवतौ, उण पै’ली तौ परमो ढोली ऊकडू होय’र सरू हुयग्यौ— “और नई तौ कांई दुकेलौ? म्हारै रूबरू री बात है। वा कूंट दीसै है के, बठै साहजी सा री हेली बण री ही। पट्टियां चढणी ही। कारीगर (सुरजो) पट्टी झेलबा खातर भीत माथै बैठौ हौ। हेठै चार मजूर्या कूकरियां री जियां पट्टी सूँ उळझ रह्या हा। उडीकतां—उडीकतां कारीगर आघतौ हुयग्यौ। सेवट खाय बूंबळ’र हेठै कूद आयौ अर धोती रा खो’जा टांकतौ बोल्यौ— “परै हो जावौ रे नाजोगां! सात दिनां रा उवास्या हौ कांई? आगै जा’र भाठौ ई तौ है, सीसौ तौ आथ कोनी! आघी म्हेलौ थांरी अँ सांकळां—फांकळां अर बैठ जावौ आंतरै जा’र।”

“डील में बीं रै, के बेरौ हडमानजी आया कै भैरुंजी, आडी पट्टी जोधपुर री बा’रा फुटी पट्टी री कोरां गै’री झाली अर जोर री अक ‘हुम्’ रै सागै मगरां रौ झालौ दे’र ऊंच ली। आदमी कांई हो बजराक हौ। नान्हा—नान्हा पांवडा म्हेलतौ लदाण माथै आघौ ई कोनी चढियौ, जीं पै’ली तौ पट्टी रौ आगलौ बूंगौ उतरादी भीत माथै म्हेल दियौ। फेर पाधरौ हुय’र लारलै बूंगै नै— आपां टैण रौ चद्दर पकड़— जियां पकड़’र दिखणादी भीत माथै म्हेल दियौ। आघी कलाक तांणी वा ‘हुम्’ ‘हुम्’ चालती रही अर पट्टियां सटाक—सटाक म्हेलीजती गई। मजूरिया सांस रोकियां, सांप—सूँघ्योडा—सा चिरबळ—चिरबळ देखता रह्या। पूरी बाईस पट्टियां म्हेल’र पसेव सूँ न्हायोड़ौ वौ बारलै नीमडै री छियां कांनी चाल्यौ जद वीं री साथळां री फूल्योड़ी मछलियां रौ सळसळाट देख’र लोगां रौ जीव धापियौ। चूनै रा खाली तसळा माथै लियां सागै काम करण वाळी मजदूरणियां रा मन तौ डोलर हींङे चढग्या।

“घर घणी साहजी सा खुद अक सौ इग्यारै लंबर रौ तिलक लगायां सो—कीं देख

रह्या हा— आ डीघी पूजती काया, अर आ चौड़ी छाती जिकी इण बखत भरीजियोडै सांस रै समचै, बी'त बी'त भर ऊंची—नीची हुय रैयी; भरियोडै चै'रै माथै औ... मोटा—मोटा आंखियां रा डोळा, जिणां मांयला राता डोरा गै'रा लाल हुयोडा; पींडियां, साथळां अर बूकियां माथै जाणै पींड म्हेल्योडा; पेट मांय धंसियोडौ अरपतळी ना'र जिसी कमर; लीलै भाटै सूं कोर'र जाणै मूरत काढी हुवै; खराद माथै चढा'र जाणै उतारियो हुवै— अस्यौ वौ सरूप लाग रह्यौ। साहजी सा सांकडै आ'र थुथकारौ न्हांखता बोल्यो— धन है भाई सुरजा थनै थूं इण गांव रै पाणी री लाज है। बडेरा कैवता आया है कै नर री पींडी रौ मोल नीं अर आदमी री ताकत रौ कूंतौ नीं, सो सुणी तौ केई वार, पण आज आंखियां देखी है।

सुरजौ बोल्यो— “सो तो मायतपणौ है थारौ, पण नारेळ—आरेळ कोनी बधारणौ कांई?”

साहजी सा जाणै ऊंचै सूं पड़िया। बरसां सूं कमाई खातर परदेस रैवण मांयकर असी जरूरी रीत तकात री वानै सुध नीं आई। हमै उम्हीज'र नैडै ई ऊमै आपरै बेटै सूं बोल्यो— “जिया रे रामजी दो—च्यारेक नारेळ मांय सूं। दातारी में रामजी पिण बाप सूं दोय हाथ आगै हौ। आधी बोरी नारेळां री कच्चोडै घर में पड़ी ही, सो जियां री तियां ल्याय म्हेली बारणै। सै कारीगरां अर मजूरान नै न्यारौ—न्यारौ नारेळ मिळियो। अठीनै सुरजै रै हाथ में नारेळ आयौ, अठीनै वौ म्हेल वीं नै चांतरै रै भाटै माथै अर जोर सूं मारियो मुक्कौ— जाणै घण पड़ियो हुवै लुहार रौ— अर डाढी सूधै नारेळ री चिटकां बिखरगी।”

परमै ढोली री कूकड़ी रौ तागौ औरूं पिण नीं टूटतौ, पण इण बिचाळै चौधरी अेक नूवो घोचौ म्हेल दियो हौ सिगड़ी में, जिकौ कीं आलौ हुवण सूं धुंवौ दैण लाग्यौ। बायरै री सोय सूं धुंवौ पाधरौ परमै री आंख्यां में पूंग्यौ। सिगड़ी में फूंक दैण री बजाय दमाही

लारै सरक'र दूंडी टेक दी। सांवतौ अर मोवन बिलग्या जिकौ मार—मार फूंकां अर पाछी ६ पळकै चढाय दी सिगड़ी नै

जीवण बोल्यो— “अेऽ बीं दिन तौ म्हुं हौ कोनी गांव में। उणरै दूजै दिन री बात है। ओई कोई पो'रेक दिन चढियो हुसी। म्हुं सिवजी भूतडै री दुकान माथै बैठौ हौ कै सुरजो आयौ बटै कीं सौदो लेवण नै सिवजी वीं नै बूझ्यौ कै म्हे तो सुणी सुरजा का'ल थूं मुक्की री देय'र डाढीदार नारेळ फोड़ न्हांखियो, जिकी साची बात है कांई? सुरजौ मुळक'श्र कह्यौ कै सेठां, अेकलौ बाईस पट्टी चाढी, जीं री सांच तौ बूझी कोनी, नारेळ फोड़बा री भली बूझी! बापडै अेक नारेळ रौ कांई तौ फोड़णौ? हां, अलबत्ता दोय नरेळ अेकण सागै फोड़बा रौ मौकौ आवै जरै कीं ठा पडै। दोय रा आंना अढाई लागै बापजी, कठा सूं लाऊं गरीब आदमी? सिवजी बोल्यो— मन री काढणी हुवै जरै तौ लाऊं। फोड़ नांखै तौ नारेळ थारा, नींतर म्हुं पाछा म्हारी दुकान में म्हेल लेस्युं। सुरजो हामी भरी, जरै सिवजी मांय जाय'र बोरी मांय सूं उकराळ—उकराळ'र दोय नुंवां अर सच्चम नारेळ टाळ परा'र ल्यायौ। सुरजो दुकान रै दासै माथै दोनूं नारेळां नै आडा, उपराथळी म्हेल'र डावै हाथ सूं ऊपरला नारेळ नै काठौ ढाब लियो। जीवणी मुक्की तांण'र ऊंची लेयग्यौ जटै तांणी तौ ठा है, पण के बेरो कद, बा बीजळी बण'र पड़ी कै अेक चिटक उछळ'र म्हारी डावी आंख रै ऊपर— इण जगां लागी, जद ठा पड़ी कै नारेळ दोनूं बिखरग्या हा।”

सांवतौ दोनूं हाथां सूं पगां री खाज खुजळातौ बोल्यो— “बाइफुन्ना जुवा घणा ओ... अटै तौ। वाढ्यां म्हेलै।” खवास कह्यौ— “थारौ लोही मीठौ है। म्हारै तौ नैडा ई कोनी आवै। सांवतौ थोड़ी—सो मुळक्यौ अर लाजां मरतौ—सो बोल्यौ कै म्हारै थोड़ी चूनै रौ इंतजाम करणौ है, जिकौ म्हुं तौ हमें चालस्युं

रै भायां!" फेर आपरी घूघी नै जचाय, हाथां नै उणरै मांय लकोवतौ वौ ऊभौ हुयग्यौ अर बहीर पड़ियौ। अंधारै में जावती घोळी घूघी थोड़ी ताळ तौ दीसती रही, फेर होळै-होळै अलोप हुयगी।

तमाखू रौ लकड़ी रौ गट्टौ, जिणरै मूंडै में चिलम पिण फंस रैयी ही, उठार खवास कांनी आघौ करतौ चौधरी बोल्यौ- "भर रे मोवन अेक चिलमड़ी!" मोवन पडूत्तर दियौ कै कांई करबा नै? कुण काळजौ बाळै फाऊ ई? पीवण जोगी चीज री तौ बूझी कोयनी अर चिलमड़ी कर दी आगै!" समझदार नै तौ इसारौ ई काफी। चौधरी मुळक परोर ऊठ्यौ अर हेली रै मांय परो गयौ। बावड़ियौ पाछौ, जरै दोवड़ी कामळ मांय सू हाथ बारै काढ दारू री बोटल खवास रै मुंडागै म्हेल दी। रंग देखतां ई मोवन अर परमो दोनूं पिछाण ली कै 'गुलाब' है, अर चैरा पिण दोयां रा गुलाब जिस्या ई खिलग्या। मोवन डाट खोल परोर दारू में आंगळी डबोई अर माताजी रै नांव सू छांटा ऊपरांनी हवा में उड़ाया। फेर तीनूं जणां बारी-बारी सू बोटल रै मूंडौ चेड चेडर गुटक्यां लेवण लाग्या। मैफिल जमगी। थोड़ी-सी तराटी आई अर कानड़ा कीं ताता हुया जरै मोवन बोल्यौ- "हमै तौ भर परमा चिलमड़ी!"

आंगळी सू कुचर-कुचर परमो गट्टै सू तमाखू काढी अर हथेली माथै म्हेलर जीमणै हाथ रै अंगूठै सू डांखळां नै मसळ्या। कांकरी नै नाळ रै मूंडै जचायर चिलम में तमाखू दाब-दाबर भरी। फेर दोय घोचां रै चीपियै सू अेक नान्हो-सो खीरो सिगड़ी मांय सू काढर चिलम माथै जचायौ अर होळै-होळै सारी। जीवण घूट लेयर बोटलड़ी परमा कांनी आघी करी जरै परमो चिलमड़ी मोवन नै पकड़ाई। घूट भरर परमो बूझ्यौ कै आ बात म्हारी समझ में कोनी आवै कै वा ई

दाळ-रोटी सुरजो खातो अर वा ई दाळ-रोटी आपां खावां, पण...?"

चिलम रौ धुवौ छोडतौ मोवन बोल्यौ- "अरे... खायां सू कांई हुवै, हजम होवणौ चाईजै। घणौ चोखौ खावै, जिकां नै घणी बेगी सिगरणी होवै अर फेर तरड़्यौ करता फिरै। सैरां सू आवै कोनी कांई पिलांदरा पड़िया सेठ-साहूकार आपणां बैदराजजी कनै परपट्यां लेवण खातर? आखौ-आखौ दिन गादी-तकियां माथै गुड़िया रैवै अर घड़ी दोय घड़ी सिंझ्या री टैम घूमण नै जावै, तौ मोटरां में। पछै खायौ-पीयौ हजम हुवै कीकर? रोटियां वां रै पेट में उणीज तरियां पड़ी रैवै जिण भांत पैली कटोरदान में पड़ी हुती। अेक कटोरदान सू काढर दूजै कटोरदान (पेट) में म्हेल देवण सू रोटियां डीलां थोड़ी लागै! सो हाजमो बडी चीज है। सुरजै रौ हाजमौ जबरदस्त हौ। भाठा पिण खा जावतौ तौ हजम हुय जावता। थूं हौ नीं रे चौधरी, जोसीजी म्हाराज रै पोतै रामेसर री जान में.. सेंसड़ै?" चौधरी माथौ हलायर बतायौ कै कोनी हौ।

"जरै किसै बिल में बड़र बैठग्यौ हौ? गांव में तौ लारै बूढा-ठाडा गिणती रा आदमी रैयग्या हा। बिसी जान म्हुं तौ म्हारी जिनगी में देखी नीं। गाड्यां सू गाड्यां जुड़गी अर बींद रौ रथ टेट सथाणै रै आपेटै पूंचग्यौ जतरै कोटीगडौ आपणी आकर्यां में ई पड़ियौ हौ। जान सेंसड़ै पूगी जद साम्हलौ घणी मंगजी उपाधियो आर जोसीजी नै हाथ जोड़र कह्यौ कै बापजी, जानी तौ इतरा ल्याया जिका चोखा पण इतरा बळदां खातर चारौ म्हुं कटै सू ल्यासू? जोसीजी आकरा पड़िया-तौ कांई... फाटगी? लखपती रौ... बण्यौ फिरै है? म्हानै पाळा बुलावण रौ मन हो कांई? पागड़ा नीं ऊंचै तौ झेलिया क्यूं हा? भलौ फिकर करियौ। हमार पाछी जुता देस्यूं

आठ-दस गाड्यां, जिकी आथण ताई भर चारौ अर ले आसी म्हारै गांव सू।

“दूजै दिन परभातै खीचड़ी-बाटां री कच्ची रसोई होणी ही। रीत मुजब पुरसगारी रौ घी पास कराबा खातर ब्याही मंगजी अक चरी में घी भर’र जान रै डेरै ल्याया। उण बगत जोसीजी अमल गाळ’र मसंद लगायां, गादी माथै बैठा होकौ पी रह्या हा। डावै पसवाडै बैठ्या हा भोळूजी चौधरी, वां रा खासमखास अर जीमणै पसवाडै बैठ्या हा म्हारला काकोजी जोधराज नाई। चरी म्हेल’र मंगजी जाजम माथै ई बैठण लाग्या जद जोसीजी ऊठ’र वांनै हाथ पकड़’र आपरै जोडै गादी माथै बिठाया। होकै री नळी नै ब्याहीजी रै मूंडागै करी, हालांकै जोसीजी जाणता हा कै मंगजी तमाखू पीवै कोनी। मंगजी सेती बटै बैठ्या सै जणां मुळकिया। पछै आपरै पोतै मांय सू अमल रा कुटका हथेली माथै लेय’र वां रै मूंडागै करिया, जिणां मांय सू अक छोटी-सीक कांकरी नै उठा’र मूंडै में ले लीं

“होकै री नळी नै पाछी मूंडै में लेवता जोसीजी बोल्या— कर रे जोधराज घी री पिछाण। काकोजी आंगळी डबो’र घी देख्यौ—कसबू ली। बोल्या— घी सांतरौ है।

भोळूजी चौधरी पिण देखियौ अर तारीफ करी। घी पास हुयग्यौ।

“सुरजौ पिण बटै बैठ्यौ हौ, लारलै पसवाडै औरां रै सागै। वीं सू बूझणी आयग्यौ— ई चरी में कतरोक घी है जजमान? मंगजी अपूठा मुड़’र सुरजै कांनी मींट बांध’र देखियौ। बोल्या— हुसी ओई कोई पूंणीक च्यार सेर। क्यूं... पीणौ है कांई?

—नई, अयां ई बूझ्यो हो। अर थे कैवौ हो जजमान, तो पी लेस्यां।

—आघौ—परधौ कै पूरौ ई?

—पूरौ ई पी लेस्यां, आघौ—परधौ क्यूं?

—दस्तां छूट जावैली, तरड़्यौ करता फिरोला।

—अकर जाऊं जजमान निमटबा खातर, जकौ तौ जाऊंला ई। दूजी वार लोटौ उठाऊं तौ हाथ पकड़ लीज्यौ।

—जरै पीवौ परा, म्हे ई देखां।

सुरजौ ऊठ’र आगै आयौ। अक करी न दोय, उठाय चरी अर मूंडौ टेक्यौ जकौ गटक—गटक—गटक... चरी खाली हुयां ई आघौ कर्यौ। मगजी रौ मूंडौ देखौ तौ थाप खायोडौ।”

बोतलड़ी रौ पींदौ आयग्यौ जरै जीवन वीं नै सिगड़ी रै हेठै गुड़काय दी। परमो धुंवौ छोड’र चिलम मोवन कांनी आघी करी। दोनू हाथां में चिलम ढाब’र मोवन सफ—सफ करतौ अक जोर रौ सफीड़ लगायौ अर धुंवै नै काळजै में उतार लियौ, जठै सू वौ होळै—होळै, रमतौ—रमतौ ऊंचौ आ’र नाक रै रस्तै बारै निकळतौ रह्यौ।

चिलम झेलतां जीवन बोल्यौ— “म्हूँ तौ उण दिन रात पड़ियां मेड़तै सू पाछौ आयौ जरै सुणी कै सुरजो तौ आज दारु पी’र मरगौ। वौ इसी अणूँती तौ कोनी पीवतौ हौ, फेर आ बात बणी कियां?”

मोवन पडूत्तर दियौ, “अजी, जोग टळै है कांई? दिनुंगै सिरावण कर’र राजी—खुसी कमठै माथै वहीर हुयौ जरै कुण जाणी ही कै वीं रौ आज रौ दिन आंथेलौ नीं। घर सू बारै नीसर्यौ ई हौ कै गढ रै दरीखाने में बैठ्या ठाकर सा’ब बारी मांय सू ई हेलौ पाड़ लियौ— आव रे सुरजा, आव। कमठै माथै तौ रोजीना ई जावै। अक दिन नाघा ई सही। सुरजौ जाणग्यौ कै आज तौ ठाकर दिनुंगै ई बोतल खोल ली दीसै। गढ री छियां में वीं रा बाप—दादा पीढियां सू रैवता आया, जिकौ बेराजी कियां करतौ ठाकरां नै? मझ दोफारां बावड़ियौ गढ सू तौ आंखियां रा डोरा राता लाल हौ म्हेल्या हा। क्यूं नीं उणी’ज बखत वीं रै छोरे नाराण रै सगपण री बातचीत करण सारु कड़ैल सू पांवणा आ जावै? अक दिन

आगै—लारै कोनी आ सका हा काई? पण जोग पीवणौ हौ।

“भावै जोग म्हूँ बटी सूँ नीसर्यौ। सुरजो म्हनै नैडौ बुला’र कह्यौ कै गोळ झूँपै में दोय माचा ढाळ दै अर छान मांय सूँ लाय’र पाणी री मटकी टिमची माथै म्हेल दै। म्हूँ अै काम निवेडूँ जा पै’ली तौ वौ कलाळ रै घर सूँ—नैडौ ई तौ है—दोय बोटलां नारंगी री लियायौ। अेक माचै माथै दोनूँ पांवणा बैठिया अर दूजोडै माथै सुरजो अेकलौ। बटीनै छान में रोट्यां री तयारी हुय रैयी ही, जटै सूँ अेक बाटकै में चार—पांचेक कांदा कटीज’र आयग्या। म्हूँ चालण लाग्यौ जरै सुरजो बोल्यौ— बैठ—बैठ, जावै कटै है? खोल बोटलड़ी। अेक बोटल रौ डाट खोल’र म्हूँ देवतां रौ छांटौ उछाळ्यौ अर बोटल पांवणां कांनी आधी करी। होळै—होळै मैफिल जमगी।

“अेक बोटल निठी जितरै पांवणां तौ तन्नैट होयग्या अर हाथ जोड़ लिया। म्हारी जीभ पिण आंटौ खावै लागी अर माथै में चकरी हींडौ चालग्यौ। सुरजै री आंख्यां रा डोळा— अै खीरा है क सिगड़ी में—इसा राता लाल हुयग्या। म्हारै कांनी देख’र सुरजो कह्यौ— “खोल रे मोवन दूजोड़ी, पांवणा री मनवार तौ हाल करी ई कोनी। म्हूँ कह्यौ— कै पांवणा तौ अबै कोनी अरोगै अर थे पिण हमें रैवण दो। घी री चरी कोनी है जिकौ..!

“निजरां काई घुमाई, दो बळबळता खीरा म्हारै चैरै माथै म्हेल दिया। म्हूँ मांय तांणी धूजग्यौ। म्हारै हाथां नै बोटल खोलणी पड़ी अर पांवणां री मनवार करणी पड़ी, पण वै क्यूँ पीवण लाग्या? मूंडौ चेड—चेड’र बोटल सुरजै कनै पुगाय दी। आपां बळदां नै नाळ देवां हां क, जियां वौ ऊपर सूँ ई डग डग डग आधी’क बोटल मूंडै में ऊंधा ली अर बोटल म्हनै झिलावतौ बोल्यौ— लै, पीड। थनै थारै मानै जिकां री आंण है नीं पीवी तौ। फेर अेक बीड़ी सिळगा’र माचै माथै आडौ होयग्यौ अर

गाणौ गावै लाग्यौ। म्हूँ सोची कै ई नै हमें नींद चिप जावै तौ चोखी, पण कुण जाण्यौ कै वौ तौ बडोड़ी नींद री उडीक में है।

“पाछौ ऊठ’र बैठौ हुयग्यौ। कोई कीं कैवै, जा पै’ली तौ बोटल उठा’र बचियोड़ी दारू पिण पधरा ली अर खाली बोटल नै जमीं माथै गुड़ाय दी। म्हें तीनूँ जणां डरग्या अर म्हांरौ नसौ उतरग्यौ। चांणचकी बोल्यौ— अरे मोवन, म्हारै माथै में औ ढीमडौ चालै है जकौ तौ ठीक, पण ई री पनड़ी माळजादी आ घड़ी—घड़ी में पड़ै है क खटी...ड़ खटीड़— ई नै परी तोड़’र बगा रे!

“म्हूँ देख्यौ कै औ सीत में आयोडौ हुवै ज्यूं कियां करण लागग्यौ। जतरै तौ कुड़त्यै नै खोल’र बगा दियौ अर बोल्यौ— आ पांणी री मटकी म्हारै माथै ऊंधा दै, बळत फूट रयी है।

“मटकी रौ पांणी माथै आवतौ नीं दीस्यौ, जरै वौ माचै सूँ ऊठ्यौ, पण खाय गरणाटी’र पाछौ पड़ग्यौ। फेर ऊठ्यौ अर झूँपै रै बारणै सूँ नीसर’र सांम्हलै कोहर रै कोठै कांनी चाल्यौ— अधर पगां, डावै—जीवणै हींडा खावतौ— ज्यूं बायरै में रूई रौ चूखौ उडै— जाणै आंधी रै फटकारां में पांयां रौ भिंटोरौ मारग सोघ रह्यौ हुवै। कोठौ तौ कोठौ, खेळी तांणी पिण नीं पूग्यौ हौ कै आंख्यां माथै काच फिरग्यौ। खेळी रै बारलै खाबूचियै रै कादै—पांणी में गडूरडा रमै हा, जिणां रै बिचाळै जाय पड़ियौ— घड़ीम! डरियोड़ा गडूर कादौ उछाळता बारै भाज्या। वां मांय सूँ दोयेक खाबूचियै रै सांकड़ा ऊभा थोड़ी ताळ चूँ—चूँ करता रह्या, जाणै बूझता हुवै कै औ अजब—गजब रौ गडूर कटै सूँ आयौ। मिंट दस—पांचेक लागी अर वौ नाड़ न्हांख दी।”

परमै अर जीवण नै सिगड़ी रै खीरां में घणी ताळ सुरजो दीसतौ रह्यौ— कादै में कळीज्योड़ौ, दम तोड़तौ।

अबखा सबदां रा अरथ

बळीतौ=ईधन (जलाऊ लकड़ी)। टोटो=कमी। ठारै=ठण्ड (सर्दी)। आखै=पूरै (सम्पूर्ण)। कठफाड़ा=फाड़ियोडी लकड़ी। मुरदो=शव (लाश)। रूसियो=नाराज। मझ=बीच। उन्हाळै=गर्मी में। मड़कल=दुबली-पतली। नाज=अनाज। बूझै=पूछै। ओस्था=उमर। कसबू=गंध। अँसान=एहसान। ओँजू बेसी=ओर भी अधिक। हेठानी=नीचे से। उबास्या=भूखा (उपवास कियोड़ा)। पाळा=पैदल। अपूठा=पीछे। सेर=तौल की इकाई। चाणचकी=अचानक। गरणाटी=चक्कर। झाली=पकड़ी। पसेव=पसीना। माचा=खाट। सौदो=चीज-बस्त। होळै=होळै=धीरे धीरे। फाऊ=फोगट। ताता=गरम। हजम होवणौ=पचणौ। दिखणादी=दक्षिण दिसा में। सगपण=सगाई। तासौ=तंगी, कमी। गोडा-गोडांणी=(गोडां तांई) गोडां सूणी। मड़कल=थाकोड़ी, पतळौ, दुबळौ।

सवाल

विकल्पाक पङ्क्तिर वाळा सवाल

1. 'सूरजो नायक' संस्मरण किण पोथी सूं सामिल करीज्यौ है—
 (अ) उणियारा ओळ्यूं तणा (ब) रोवणिया दासा
 (स) ओळूं री अखियातां (द) मन सूं कदै न वीसरै
 ()
2. गांव में बळीतै तकात रौ टोटौ आयग्यौ—
 (अ) खेत खडण सूं (ब) अकाळ पड.ण सूं
 (स) धरती उतर देणै सूं (द) रुखां री कटाई सूं
 ()
3. "आव हाथ सेकलै थोड़ा, ठारो बेजां पड़ै है।" आ बात कुण किणनै कही—
 (अ) चौधरी परमै नै (ब) मोहन परमै नै
 (स) परमै सांवतै नै (द) सांवतै मोहन नै
 ()
4. "भावै ई जोग म्हें बठी सूं नीसख्यौ।" बठी सूं कुण नीसख्यौ—
 (अ) मोहन (ब) सांवतो
 (स) सुरजो (द) जोधराज
 ()

साव छोट पङ्क्तिर वाळा सवाल

1. जोधराज आपरै जीवण में किण चीज सूं घणौ आंतरौ राखियौ?
2. साहजी नै किण रीत री सुध नीं आई?
3. 'गांव रै पांणी री लाज' किणनै बतायौ गयौ है?
4. सिगड़ी रा खीरां में कुण दीसतौ रैयौ?

छोटा पढ़ूतर वाळा सवाल

1. संस्मरण अर रेखाचित्रांम में अंतर स्पष्ट करौ?
2. "साहजी सा जाणै ऊंचै सूं पड़िया।" साहजी री आ गत क्यूं हुई?
3. "समझदार नै इसारौ काफी।" इण ओळी रौ आसय स्पष्ट करौ?
4. अरै खायां सूं कांई हुवै, हजम होवणौ चाईजै।" आ ओळी कुण किणरै सारू कैयी?

लेखरूप पढ़ूतर वाळा सवाल

1. सूरजै री ताकत रौ बखाण करण वाळी दो घटनावां रौ खुलासैवार वरणन करौ।
2. 'ओ संस्मरण हकीकत रौ बखाण करतां थकां सही मारग चालण रौ इसारौ करै।' सहमति-असहमति बाबत आपरा विचार प्रकट करौ।
3. इण संस्मरण री गद्य शैली री विसेसतावां नै दाखला देय'र समझावौ।
4. 'सूरजो नायक' संस्मरण रौ संदेस आपरै सबदां मे विस्तार सूं उजागर करौ।
5. नीचै दिरीजी ओळियां री परसंगारु व्याख्या करौ—
 (अ) मझ ऊनाळै जोहड़ में दोबड़ी ऊभी रैवती गोडां-गोडांणी, जठै नैड़ा-नैड़ा गांवां रौ धन ढूकतौ, बठै आज इणी'ज गांव री मड़कल गायां जमीं सूंघती फिरै, चरबां नै तिणकलै रौ ई काम नीं। अर कितरौ धान निपजतौ हौ इणरै खेतां-जावां में। छोटा-मोटा करसां रै अठै थळ्यां-मूंडै पड़ियौ रैवतौ। आज धान सूं गार री कोठी पिण नीं भरीजै।
 (ब) आजकाल रा मजूर न्याल करै है कांई ? पो'र खंड दिन चढियां पै'ली तौ आवै ई कोनी। दो-दो बार वांनै बुलाण खातर जाऊं अर जियां तियां भाई-बीरौ कर, पोटा पोटू'र ल्याऊं तौ आवतां ई घेरौ घाल'र चिलम पीवण नै बैठ जावै। काम माथै कांई आवै, जाणै म्हारै माथै औसान करै।